

# MANIPOL


11, mei, 1971





**MANIPOL**

**11, mei, 1971**



*UCHAPAN Y.A.B. TUN HAJI ABDUL RAZAK BIN HUSSEIN, YANG DI-PERTUA UMNO MERANGKAP PERDANA MENTERI DI-UPACHARA IKRAR MENYAMBUT ULANG TAHUN UMNO YANG KE-25 TAHUN DI-STADIUM NEGARA, KUALA LUMPUR, PADA 10HB MEI, 1971 JAM 10.30 PAGI.*

Saudara Pengerusi,  
Ahli2 Majlis Kerja Tertinggi,  
dan Saudara2:

Kita semua berhimpun di-sini pada hari ini ia-lah pada waktu dan ketika yang penting dan bersejarah bagi Parti kita UMNO, ia-itu ketika kita menyambut usia Parti kita yang ke-25 tahun.

Kehadiran saudara2 di-majlis yang bersejarah ini ada-lah membuktikan dengan jelas dan terang-nya akan kejayaan kita, ahli2 UMNO, menjaga keutuhan dan perpaduan Parti dan juga kesediaan dan kesanggupan kita menyambong perjuangan UMNO di-atas landasan yang telah di-bena dengan kukoh 25 tahun yang lalu.

Dalam masa suku abad ini, UMNO, sa-bagai Parti yang mewakili orang Melayu, telah berjuang di-tengah2 gelanggang politik negara untok kepentingan umat Melayu khas-nya dan kepentingan bangsa dan negara 'am-nya. Kita semua bershukor ka-hadzrat Tuhan Rabul'alam, pada hari yang bersejarah ini sungguh pun UMNO, sekarang berusia 25 tahun, akan tetapi ia maseh lagi kuat dan subur. Saya sendiri mempunyai keyakinan yang penoh bahawa UMNO akan bertambah kuat dan subur pada masa2 yang akan datang.

Di-hari yang bergembira dan bersejarah ini, mari-lah kita menguchap shukor ka-hadzrat Allah Subhanahu-wata'ala di-atas hidayah-Nya kapada kita semua dan perkenan-Nya dalam segala usaha dan perjuangan Parti kita ini. Oleh itu kita bersama2 di-majlis ini berikrar dan membaharui azam dan tekad untok menchapai kejayaan2 yang lebeh chemerlang dan menafa'at lagi kapada bangsa, negara, parti dan kita semua di-masa2 hadapan.

Sa-bagai Yang Di-Pertua UMNO, saya sangat-lah terharu mendengar dan menerima ikrar ta'at setia saudara2, ahli2 UMNO sekalian yang telah di-lafazkan oleh Ketua Pergerakan Pemuda sa-bentar tadi. Saya yakin dengan pembaharuan ikrar ta'at setia kapada puchok pemimpin Parti dan patoh kapada dasar dan perjuangan Parti serta keazaman untok meneruskan perjuangan

Parti, masa hadapan parti kita sangat-lah cerah. Saya suka bersama2 saudara2 juga berikrar pada hari ini bahawa saya sendiri pun akan menyabong nyawa saya, jika perlu, bagi mempertahankan kedaulatan dan kemerdekaan negara kita ini dan bersama2 menchurahkan usaha dan tenaga bagi menjaminakan perpaduan dan kebahagiaan hidup ra'ayat sekalian.

## SEMANGAT BERANI MENYALA

Perpaduan dan chinta kapada tanah ayer dan bangsa yang di-tunjokkan oleh orang2 Melayu pada masa UMNO di-tubohkan pada 11hb Mei, 1946, hendak dan mesti-lah di-terus dan di-kekalkan. Semangat berani dan kesanggupan untok menjaga dan mempertahankan kepentingan2 ra'ayat dan hak2 asasi kita mesti-lah di-kekalkan dan di-perkukuhkan lagi. Ini-lah semangat yang di-tunjokkan oleh ahli2 UMNO dalam masa 25 tahun mereka berjuang.

Saya bershukor ka-hadzrat Tuhan kerana semangat ini maseh lagi menyala dalam dada tiap orang ahli UMNO, pemuda dan Kaum Ibu. Saya yakin dan perchaya, dengan izin Tuhan, semangat ini bukan saja akan terus menyala tetapi merebak di-hati sa-tiap ahli UMNO dan Parti kita akan bertambah kuat, bertambah subur dan menchapai kemajuan yang lebeh chemerlang lagi pada masa2 yang akan datang.

UMNO telah di-lahirkan pada 11hb Mei, 1946, di-Istana Besar, Johor Baharu, ekoran dari satu Kongres Politik Melayu yang telah di-adakan di-Kuala Lumpur pada bulan Mach tahun yang sama. UMNO di-lahirkan bagi menentang Malayan Union, ia-itu konsep Kerajaan British hendak menjadikan Tanah Melayu

sa-bagai sa-buah tanah jajahan langsung atau British Colony dengan merampas hak2 bangsa Melayu dan kuasa2 yang ada di-tangan Raja2 mereka.

## MALAYAN UNION RUNTOH

Alhamdulillah, shukor kita ka-hadzrat Tuhan, di-bawah pimpinan Allahyarham Dato' Onn bin Ja'afar, penganjor Melayu yang ulong dan utama, UMNO dan orang2 Melayu telah berjaya menghapuskan Malayan Union. Malayan Union telah di-kuborkan dan Persekutuan Tanah Melayu yang menjamin dan memelihara kedudukan dan kedaulatan Raja2 Melayu dan hak2 istimewa orang2 Melayu telah di-lahirkan pada 1hb Februari, 1948.

Sa-lepas Malayan Union, UMNO telah meneruskan perjuangan-nya menuntut kemerdekaan bagi Tanah Melayu. Ahli2 UMNO berpendapat sungguh pun kuasa telah di-serah balek ka-tangan Raja2 Melayu akan tetapi kuasa penoh atau kuasa muktamad dalam urusan2 Kerajaan dan pentadbiran negara maseh tetap berada di-tangan British dan sa-lagi keadaan yang demikian berada, maka nasib umat Melayu tidak dapat dan tidak boleh di-baiki dan Tanah Melayu akan terus di-jajah, tidak saperti negara2 jiran di-Asia dan sa-rantau yang sudah pun merdeka pada waktu itu.

Dalam tahun 1951, dengan desakan yang kuat daripada Pergerakan Pemuda UMNO, seruan UMNO "Hidup Melayu" telah di-tukar menjadi "Merdeka". Bulan Ogos tahun itu juga puchok pimpinan UMNO telah berubah. Allahyarham Dato'

Onn telah meletakkan jawatan sa-bagai Yang Di-Pertua UMNO dan beliau telah di-gantikan oleh Tunku Abdul Rahman Putra.

Mulai dari tarikh itu, UMNO telah menjalankan segala ikhtiar dan usaha menuntut kemerdekaan Tanah Melayu. UMNO telah mengadakan perundingan2 dengan bangsa2 asing yang menumpukan ta'at setia mereka kapada Persekutuan Tanah Melayu terutama sekali dengan pihak kaum China yang di-wakili oleh MCA. Di-Perhimpunan Agung UMNO yang di-adakan di-Kuala Lumpur pada 29hb dan 30hb Mach, 1962, UMNO telah membuat ketetapan menuntut Kerajaan Peralehan dengan sa-berapa segera.

Kerajaan Peralehan ini hendak-lah menyedia dan mengada-kan jadual bagi kemerdekaan Tanah Melayu. Waktu itu juga perundingan2 sa-chara "informal" telah di-adakan dengan pihak MCA dan pada 3hb Februari, 1953, satu perundingan yang di-sebutkan "perundingan meja bulat" telah di-langsungkan yang bertujuan untok bertukar2 fikiran dan menchari kata sepakat dengan pihak MCA bagi menentukan strateji tuntutan kemerdekaan negara kita.

Hasil perundingan itu ia-lah desakan supaya di-adakan pilehanraya umum perengkat kebangsaan sa-chepat mungkin dan sa-telah itu wakil2 yang di-pilih oleh ra'ayat mesti-lah menubuhkan kerajaan pemerentahan sendiri atau "self-government". Pada tahun 1954, MIC telah masok Perikatan. UMNO, MCA dan MIC telah bertanding dalam pilehanraya umum yang pertama yang di-adakan pada bulan Julai 1955 dan Parti Perikatan yang terdiri dari tiga setia kawan itu telah mendapat kemenangan yang hebat — memenangi 51 daripada 52 kerusi pilehanraya

yang di-pertandingkan untok Federal Council atau Majlis Meshuarat Undangan Persekutuan.

Kemenangan hebat ini menunjukkan dengan jelas bahawa kemerdekaan bagi Tanah Melayu tidak dapat di-tanggoh2kan lagi. Dalam perundingan2 yang di-adakan di-London dengan Kerajaan British pada awal tahun 1956, Kerajaan British telah bersetuju memberi Persekutuan Tanah Melayu kemerdekaan penuh pada 31hb Ogos, 1957.

## JASA DUA PUTRA MELAYU

Pada ketika yang bersejarah ini, mari-lah kita bersama2 memperingati jasa bakti yang chemerlang dua pemimpin agong negara kita. Kedua putra Melayu ini ia-lah Allahyarham Dato' Onn bin Ja'afar dan Y.T.M. Tunku Abdul Rahman Putra Al-Haj. Allahyarham Dato' Onn ia-lah panganjor UMNO yang ulong — pengasas UMNO dan penggerak semangat kebangsaan Melayu. Y.T.M. Tunku Abdul Rahman Putra Al-Haj ia-lah bapak kemerdekaan Negara kita. Di-bawah pimpinan Tunku, Malaya telah menchapai kemerdekaan dan kemudian Malaysia pula di-tubuhkan pada tahun 1963. Juga di-bawah pimpinan Tunku, negara kita Malaysia telah melalui berbagai2 perubahan dan menchapai kejayaan2 yang chemerlang baik di-dalam dan di-luar negeri. Di-dalam negeri, perpaduan dan semangat muhibbah telah di-perkuatkan dan di-luar negeri nama Malaysia ada-lah harum di-sisi Negara2 lain yang merdeka dan berdaulat.

Sa-telah menoleh ka-belakang mengenangkan sejarah dan peristiwa2 penting dalam perjuangan UMNO selama suku abad, mari-lah kita sekarang memandang ka-hadapan dan bersama2 membuat perhitongan dan memikirkan strateji perjuangan kita dalam tahun2 tujuh-pulohan. Kita ketua2 dan ahli2 UMNO telah di-beri amanah oleh ra'ayat untok meneruskan chita2 dan hasrat ra'ayat yang belum terchapai.

Pada hari ini kita berikrar kita tidak akan menghampakan harapan dan hasrat ra'ayat kapada kita semua. Sa-bagai sa-buah Parti yang memerintah, kita telah menchapai berbagai2 kemajuan yang di-idamkan oleh ra'ayat, tetapi banyak lagi yang maseh di-tunggu oleh mereka dan ini kita akan sempurnakan dengan sa-chepat yang boleh.

UMNO dan kawan2-nya, MCA dan MIC dalam Perikatan telah memerintah Malaya dan sekarang Malaysia tidak putus2 semenjak tahun 1955 — tahun pertama Malaya menchapai taraf pemerentahan sendiri — hingga-lah sekarang: satu masa yang panjang bagi sa-buah Parti Politik dalam sa-buah negara yang sedang membangun dan yang memegang kuasa sa-chara demokrasi dan dalam sa-buah negara yang mempunyai penduduk2 daripada berbagai bangsa.

Kita berbangga dengan rekod ini tetapi kita jangan-lah berpuas hati dengan kejayaan2 kita sa-takat ini. Kita telah melalui pengajaran dan pengalaman yang tidak bagitu manis dalam pilehanraya umum tahun 1969 apabila Parti kita dan kawan2 kita telah menang tanpa majoriti yang telah menjadi kebiasaan kapada kita. Saya harap pengalaman itu bukan akan melemahkan kita bahkan sa-balek-nya akan membaharui azam dan tekad kita untok me-

meriksa diri kita dan bersiap sedia bagi menghadapi perengkat baru dalam perjuangan politik kita dalam tahun<sup>2</sup> tujuh pulohan ini.

## DEMOCRACY ALA MALAYSIA

Sa-barang sejarah berkenaan dengan Malaysia tidak akan lengkap tanpa chatitan terhadap Peristiwa 13 Mei yang memaksakan kita membatalkan sa-lama 21 bulan pemerentahan demokrasi berparlimen. Alhamdulillah, kita telah puleh sa-mula kapada pemerentahan sechara demokrasi, walau pun demokrasi ini ada-lah demokrasi ala Malaysia, ia-itu chara yang kita fikir sebaik<sup>2</sup>-nya untok sa-buah negara yang penduduk<sup>2</sup>-nya terdiri dari berbagai<sup>2</sup> kaum yang sedang membangun.

Saya fikir sa-kadar menyebutkan sahaja Peristiwa 13 Mei dan ekoran<sup>2</sup> dari-nya, baik di-bidang politik, iktisad dan perhubungan antara kaum dan muhibbah antara bangsa, ada-lah sudah menchukopi kerana saudara<sup>2</sup> semua ada-lah mengetahui Peristiwa<sup>2</sup> ini. Perkara yang penting sekarang ia-lah mustahak kita mendapat pengalaman dan pelajaran daripada-nya buat panduan kita di-masa<sup>2</sup> akan datang.

Mas'alah<sup>2</sup> yang kita hadapi sekarang dan di-masa<sup>2</sup> yang akan datang ada-lah berlainan dengan mas'alah<sup>2</sup> yang ada sa-belum Mei 13 tahun 1969. Kita ada-lah menghadapi mas'alah<sup>2</sup> dan chabaran<sup>2</sup> yang lebeh sulit dan rumit lagi daripada masa<sup>2</sup> yang sudah. Kerana perjuangan UMNO dalam tahun<sup>2</sup> tujuh pulohan masok perengkat baru dan bagi menentukan kejayaan dan kemenangan di-gelanggang politik tahun<sup>2</sup> tujuh pulohan dan lapan

pulohan, UMNO dan Perikatan dan Kerajaan sekarang memerlukan chorak, lagak dan imej baru; sikap, chara dan pendirian baru — atau new style and new approach dalam pentadbiran dan pimpinan siasah.

## REALISM BARU PERLU

Dalam mengamalkan new style dan new approach atau langkah baru ini, dalam pentadbiran dan pimpinan Parti dan Kerajaan, satu faktor yang utama untok memandu dan menggerakkan kita ka-arrah kejayaan ia-lah wujud-nya sifat2 new realism atau sifat2 sanggup menghadapi kenyataan dan hakikat dalam negara, sense of urgency dan priority atau keutamaan yang betul dalam susunan hidup masharakat kita supaya tindak tandok hidup kita sesuai dengan tuntutan zaman.

Kejayaan UMNO setakat yang ada ini, ia-lah terutama sekali kerana ta'at setia ahli2 UMNO di-semua perengkat dan di-merata cherok kapada puchok pimpinan UMNO. Tetapi di-masa2 yang akan datang kita berkehendakkan lebeh daripada ta'at setia daripada ahli2 UMNO bagi menjaminkan keutohan Parti. Kita berkehendakkan perpaduan yang lebeh erat lagi dari ahli2 UMNO. Kita berkehendakkan ahli2 UMNO mempunyai pandangan yang luas dan jauh, daya usaha, tekun dan jujur untok mendukung dan memimpin UMNO. Perjuangan dan pergolakan politik di-tanah ayer kita ini telah masok ka-perengkat baru atau 'new phase', maka 'new features' atau sifat2 baru dalam dasar perjuangan dan matlamat kita mesti-lah di-adakan sesuai dengan kemasokan kita ka-dalam perengkat baru ini.

Saya chadangkan bagi menghadapi chabaran2 di-perengkat baru dalam tahun2 tujuh pulohan ini, UMNO mengadakan manifesto politik-nya sendiri dan sempena Jubli Perak UMNO, saya shorkan kita menamakan manifesto politik itu "Manipol 11 Mei, 1971."

Manipol 11 Mei tahun 1971 ini hendak-lah di-jadikan panduan dan tekad perjuangan ahli2 UMNO seluroh-nya untok mara ka-hadapan menjadi satu bangsa yang benar2 bersatu-padu, progresif, maju dan tamaddun sesuai dengan zaman hidup-nya.

Prinsip2 Manipol 11 Mei tahun 1971 ia-lah:

- (1) Keperchayaan kapada Tuhan
- (2) Kesetiaan kapada Raja dan Negara
- (3) Keadilan dan Disiplin
- (4) Keperbadian Negara
- (5) Keperchualian dan Berdikari
- (6) Keutohan demokrasi Ala Malaysia
- (7) Kesedaran hakikat (new realism and dynamism)

Manipol 11 Mei tahun 1971 hendak-lah di-junjung tinggi dan di-jadikan asas perjuangan politik UMNO bagi membentokkan satu bangsa Malaysia yang sa-benar2-nya kuat dan bersatu padu. Manipol 11 Mei tahun 1971 ini ada-lah tambahan2 yang bertujuan bagi menguatkan lagi semangat dan isi Perlembagaan Negara, Rukunegara dan Perlembagaan UMNO sendiri.

Hasrat UMNO sama dengan hasrat ra'ayat. Parti kita, UMNO ada-lah Parti yang di-punyai oleh ra'ayat, mewakili ra'ayat dan telah banyak menunjokkan jasa2 dan bakti2 kapada bangsa

dan negara kita. Kita telah meruntuhkan Malayan Union. Kita telah menegakkan kemerdekaan Tanah Melayu dan mempertahankan kemerdekaan itu. Kita telah mewujudkan Malaysia dan mempertahankan Malaysia. Kita telah berjaya menghadapi rintangan2 dan musuh2, baik dari dalam mahu pun dari luar. Begitu juga dalam parti kita, kita telah menghadapi berbagai krisis dari satu masa ka-satu masa, tetapi dengan izin Tuhan, kita telah berjaya mengatasi-nya semua sekali.

Semua perkara2 ini ada-lah menjadi pengajaran dan pengalaman kepada kita. Pelajaran yang penting sekali yang kita boleh dapati daripada semua perkara2 ini ia-lah sa-bagai sa-buah parti siasah, kita tidak boleh berpisah daripada chita2 ra'ayat. UMNO, sabagai parti yang telah mula2 di-wujudkan untok menyatu-padukan orang2 Melayu dan yang kemudian-nya bersama2 dengan rakan2-nya, MCA dan MIC, menuntut kemerdekaan dan mewujudkan Malaysia yang kita kasehi, tidak boleh berpisah daripada chita2 dan hasrat ra'ayat yang kasehkan negara kita ini.

Kekuatan UMNO ada-lah terletak di-atas kedudukan dan peranan kita bagi memperjuangkan chita2 dan hasrat ra'ayat. Dengan sebab itu, jikalau kita berpisah dari chita2 itu maka kita akan terlepas daripada akar umbi yang menyuborkan dan menguatkan pertumbuhan Parti kita.

## **DASAR KEPENTINGAN NEGARA**

Oleh kerana keadaan politik UMNO ada-lah parti orang2 Melayu tetapi pada hakikat-nya UMNO ada-lah memperjuangkan kemudahan dan kesenangan untok semua ra'ayat yang miskin

tanpa mengira bangsa dan UMNO akan mendahului kepentingan nasional dan ra'ayat daripada kepentingan sectional atau puak2 yang tertentu. Kita akan memecahkan mas'alah2 berdasarkan kepada kepentingan negara dan keuntongan ra'ayat seluroh-nya terutama sekali mereka yang tidak berada.

Dalam zaman pembangunan ini, apa-kah sa-benar2-nya perasaan dan hasrat atau chita2 ra'ayat khas-nya ahli2 UMNO? Chita2 dan hasrat ra'ayat ia-lah mereka itu berkehendakkan kepada perubahan nasib. Mereka berkehendakkan taraf hidup mereka di-perbaiki supaya menjadi lebeh tinggi dan lebeh sempurna lagi daripada yang ada pada hari ini. Mereka berkehendakkan kedudukan ekonomi di-perbaiki sesuai sa-bagai ra'ayat sa-buah negara yang merdeka dan berdaulat dan sedang membangun.

Pemimpin2 UMNO dan Kerajaan Perikatan sedar dan mengetahui chita2 dan hasrat ra'ayat ini. Dengan sebab itu, Kerajaan sedang menjalankan ikhtiar2 dengan sa-berapa daya-nya yang boleh untok memperbaiki ekonomi dan taraf hidup ra'ayat terutama sekali mereka yang miskin dan mundor.

Sa-bagai ahli2 UMNO, kita bersama2 bertanggung jawab untok memperjuangkan chita2 dan tujuan UMNO serta hasrat ra'ayat dalam lapangan ekonomi dalam meninggikan taraf hidup dan juga mempertahankan dan memperlindung dasar2 rukun damai kita, serta memelihara perasaan muhibbah antara warga negara Malaysia yang berbagai keturunan bagi melaksanakan dasar kita untok melahirkan satu bangsa Malaysia yang tulin, kuat dan maju.

## DISIPLIN!

Oleh sebab kita mempunyai chita2 yang mulia dan tinggi, dan kerana banyak lagi pekerjaan2 mustahak yang kita belum laksanakan, maka sangat-lah mustahak kita memperkuatkan Parti kita: memperkuatkan jentera Parti kita. Segala tenaga dan semangat ahli2 UMNO — Pemuda dan Kaum Ibu hendak-lah di-salorkan bagi melaksanakan usaha2 yang berfaedah dan munafa'at kepada bangsa dan negara. Parti kita mesti-lah menurut landasan2 disiplin yang tertentu.

Disiplin tidak-lah bererti membatasi kebebasan sa-saorang — kebebasan Pemuda, Kaum dan ahli2 UMNO untok bergerak atau bersuara. Disiplin hanya sa-kadar bererti mengenakan atoran2 tertentu supaya tiap2 gerakan sa-saorang itu di-salorkan sesuai dengan dasar2 dan chita2 perjuangan Parti dan Negara.

Insha' Allah, dengan berkat Tuhan, jika ahli2 UMNO ta'at kepada disiplin Parti dan berjuang mengikut landasan2 yang telah di-tetapkan dan kesemua ahli UMNO, tanpa kira pangkat, terus jujur dan ikhlas dan bersama2 kita kembali kepada semangat UMNO tahun 1946 atau semangat tahun 1955, UMNO tetap akan terus maju dan berjaya pada masa yang akan datang. Ra'ayat akan menyokong kita. Syarat-nya kita semua kembali kepada semangat tahun 1946 dan 1955, ia-itu semangat mengorbankan masa, harta benda dan tenaga semata2 kerana perjuangan kebangsaan tanpa mengira dan mengharap sabarang balasan.

## **MESTI AMANAH!**

Kekuatan UMNO dari dahulu hingga-lah sekarang ada-lah kerana ahli<sup>2</sup>-nya ta'at kepada pemimpin<sup>2</sup> agong mereka dan patoh kepada disiplin untuk memelihara perpaduan dalam Parti. Dalam masa 25 tahun yang lalu, Tuhan telah kurniakan hidayah-Nya kepada kita dan telah menyertai perjuangan kita. Mari-lah kita berdoa' mudah<sup>2</sup>an Tuhan tunjukkan jalan yang benar dan jujur untuk kita meneruskan tugas<sup>2</sup> kita bagi memenohi kehendak<sup>2</sup> dan keperchayaan ra'ayat kepada kita.

Akhir-nya mari-lah kita kembali kepada semangat perjuangan kita pada tahun 1946 dan 1955 dan berikrar pada hari yang bersejarah ini untuk berkhidmat kepada bangsa, tanah ayer dan Parti kita dengan penoh ikhlas, jujur dan amanah.

## **BERJAYA!**

